

## Messadi davart la fixaziun dil pei da taglia 2020

Preziau signur president dil parlament  
 Stimadas parlamentarias, preziai parlamentararis

El rom dalla fusiun ei il pei da taglia per la taglia sin entrada e la taglia sin facultad vegnius fixaus sin 100 pertschien dalla taglia cantunala sempli. Medemamein el rom dalla fusiun ei il pei dalla taglia sin immobilias sesbassaus fermamein per la gronda part dallas vischnauncas anteriuras cun la fixaziun sin 1 promil.

Avon la fusiun (2013) havevan las singulas fracziuns las suandontas tariffas da taglia:

<b>fracziun</b>	<b>pei da taglia en %</b>	<b>taglia sin immobilias en ‰</b>
Castrisch	120	1.00
Duvin	130	2.00
Glion	105	1.00
Ladir	120	2.00
Luven	120	1.75
Pigniu	130	2.00
Pitasch	130	2.00
Riein	120	1.50
Rueun	130	1.50
Ruschein	120	1.00
Schnaus	130	1.00
Sevgein	120	1.50
Siat	120	2.00

La survesta muossa che las entradas da taglia per la nova vischnaunca ein vegnidas reducidas fermamein en cumparegliaziun cun las entradas dallas anteriuras vischnauncas. Quellas entradas reducidas fruntan denter auter sin expensas creschontas ch'ei d'attribuir a decisiuns surordinadas (p. ex. scolaziun, fatgs da sanadad), investiziuns gia realisadas e futuras en projects gronds (scola professiunala e center da formaziun da lenn, untgida Glion, renovaziun digl areal dalla staziun e dils autos da posta a Glion, mira planisaziun da finanzas 2020–2024), effects da sinergia presupponi memia optimistic sco era ad in grond basegns d'investar ell'infrastructura da basa.

Grazia alla buna situaziun da partenza cun las contribuziuns da fusiun ei il deivet dalla vischnaunca actualmein bass. Plinavon muossa il quen da gudogn e sperdita 2019 cun l'entschatta october 2019 levamein meglieras cefras en cumparegliaziun cun igl onn precedent. Las expensas ein pli bassas e las entradas levamein pli aultas. Quellas cefras indicheschon ch'il quen da gudogn e sperdita 2019 vegn a serrar giu bein. Il stan actual dil quen d'investiziuns muossa che las investiziuns planisadas igl onn 2019 han mo saviu vegnir exequidas parzialmein. Quei ei cunzun da motivar cun ils projects parzials alla staziun ch'ei vegni spustai. Entgins projects han saviu vegnir realisai pli favoreivel che previu. Perquei vegnan las investiziuns nettas 2019 ad esser pli bassas che previu. Quei munta che quellas san prevesiblamein vegnir purtadas excepziunalmein sezzas. La facultad vegn perquei buc a sereducir. La suprastonza communal considerescha in alzament dil pei da taglia 2020 per buca necessaris.

Quei vegn a semidar proximamein ed il deivet brut vegn sin fundament dallas grondas investiziuns futuras a crescer. Tenor art. 51 dalla constituziun communal da Glion las finanzas esser ulivadas a vesta media. Quella responsabladad ei da surprender sche las aultas investiziuns caschunan in augment dils deivets.

## Proposta

Sin fundament dallas explicaziuns precedentas fa la suprastanza communal la proposta da fixar il pei da taglia communal per la taglia sin entrada e facultad per igl onn 2020 sin 100 pertschien dalla taglia cantunala semplia.

*Ilanz/Glion, ils 18 d'october 2019*

*Suprastanza communal Ilanz/Glion*